

陸氏家制

資世通訓

浦江鄭氏家範

陸氏家制

宋史儒林傳

閬山後學汪鑑校

陸九齡字子壽八世祖希聲相唐昭宗孫德遷五代末避亂居撫州之金溪父賀以學行爲里人所宗嘗采司馬氏冠昏喪祭儀行於家生六子九齡其第五子也

九齡幼穎悟端重十歲喪母哀毀如成人稍長補郡庠弟子員肆力於學繙閱百家登乾道五年進士第繼父志益脩禮學治家有法閭門百口男女

以班各供其職。閨門之內嚴若朝廷。而忠敬樂易。鄉人化之。皆遜弟焉。與弟九淵相爲師友。和而不同學者號二陸。廣漢張栻與呂祖謙皆推重之。陸九韶字子美。其學淵粹。隱居山中。晝之言行。夜必書之。其家累世義居。一人最長者爲家長。一家之事聽命焉。歲遷子弟分任家事。凡田疇租稅出納庖爨賓客之事各有主者。九韶以訓戒之辭爲韻語。晨興家長率衆子弟謁先祠。畢擊鼓誦其辭。使列聽之。子弟有過。家長會衆子弟責而訓之。不改則撻之。終不

改度不可容。則言之官府。屏之遠方焉。九韶所著有  
梭山文集家制州郡圖。  
其辭曰。聽聽聽。勞我以生。天理定。若還。嬾情必。飢寒。  
莫到。飢寒。方怨。命虛空。自有神明聽。  
又曰。聽聽聽。衣食生身。天付定。酒肉貪多。折人壽。經。  
營太甚。違天命。定定定。

陸氏家制

梭山陸九韶子美著

閬山汪鑑晦叔校

居家正本上

古者民生八歲入小學、學禮樂射御書數、至十五歲、則各因其材、而歸之四民、故爲農工商賈者、亦得入小學。七年而後就其業。其秀異者入大學。而爲士民之德行。凡小學大學之所教。俱不在言語文字。故民皆有實行。而無詐僞。自井田廢壞。民無所養。幼者無

小學之教長者無大學之師有國者設科取士其始也投名自薦其終也糊名考校禮義廉恥絕滅盡矣學校之養士非養之也賊夫人之子也父母之教子非教之也是驅而入爭奪傾險之域也愚謂人之愛子但當教之以孝弟忠信所讀之書先須六經語孟通曉大義明父母君臣夫婦兄弟朋友之節知正心脩身齊家治國平天下之道以事父母以和兄弟以睦族黨以交朋友以接鄰里使不得罪於尊卑上下之際次讀諸史以知歷代興衰究觀皇帝王霸與秦

漢以來爲國者規模措置之方此皆非難事功效逐日可見惟患不爲耳世之教子者不知務此惟教以科舉之業志在於薦舉登科難莫難於此者試觀一縣之間應舉者幾人而與薦者有幾至於及第尤其希罕蓋是有命非偶然也此孟子所謂求在外者得之有命是也至於止欲通經知古今脩身爲孝弟忠信之人特恐人不爲耳此孟子所謂求則得之求在我者也此有何難而人不爲耶况旣通經知古今而欲應今之科舉亦無難者若命應仕宦必得之矣而

又道德仁義在我。以之事君臨民。皆合義理。豈不榮哉。



居家正本下

人孰不愛家愛身愛子孫然鮮克明愛之之道故終焉適以損之請試言其畧一家之事貴於安寧和睦悠久也其道在於孝弟謙遜重仁義而輕名利夫然後安寧和睦可得而享也今則不然所謂謙遜仁義之道口未嘗言之朝夕之所從事者名利也寢食之所思惟者名利也相聚而講究者取名利之方也言及於名利則津津然有喜色言及於孝弟仁義則淡然無味惟思卧幸其時數之遇則躍躍以喜小有沮

意則躁悶若無所容。與鑊湯爐炭無異。如其時數不遇。則朝夕憂煎。怨天尤人。至於父子相夷。兄弟叛散。良可憫也。豈非愛之適以損之乎。夫謀利而遂者。不百一。謀名而遂者。不千一。今處世不能百年。而乃徼幸於不百一。不千一之事。豈不癡甚矣哉。就使遂志臨政。不明仁義之道。亦何足爲門戶之光耶。愚深思熟慮之日久矣。而不敢出諸口。今老矣。恐一旦先朝露而滅。不得與鄉曲父兄子弟語及於此。懷不滿之意於冥冥之中。無益也。故輒冒言之。幸垂聽而擇焉。

夫事有本末。知愚賢不肖者。本也。貧富貴賤者。末也。得其本則末隨。趨其末則本末俱廢。此理之必然也。何謂得其本則末隨。今行孝弟。本仁義。則爲賢。爲知。賢知之人。衆所尊仰。雖簞瓢爲奉。陋巷爲居。已固有以自樂。而人不敢以貧賤而輕之。豈非得其本而末自隨乎。夫慕爵位。貪財利。則非賢。非知。非賢非知之人。人所鄙賤。雖紆青紫。懷金玉。其胸襟未必通曉義理。亦無以自樂。而人莫不鄙賤之。豈非趨其末而本末俱廢乎。况貧富貴賤。自有定分。富貴未必得。則將

隕穫而無以自處矣。斯言往往招人怒罵。然愚謂或有信之者。其爲益不細。雖怒罵有所不恤也。況相信者稍衆。則賢才自此而盛。又非小補矣。

## 居家制用上

古之爲國者。家宰制國用。必於歲之杪。五穀皆入。然後制國用。用之大小。視年之豐耗。三年耕。必有一年之食。九年耕。必有三年之食。以三十年之通制國用。雖有凶旱水溢。民無菜色。國旣若是。家亦宜然。故凡家有田疇。足以瞻給者。亦當量入而爲出。然後用度有準。豐儉得中。怨讟不生。子孫可守。今以田疇所收。除租稅及種蓋糞治之外。所有若干。以十分均之。留三分爲水旱不測之備。

專存米穀。不可變易銀錢輕貨。但當逐年增置倉廩。

一分爲祭祀之用。

祭祀謂先祖、中霤、社稷之神。

六分分十二月之用。

閏月則分作十三月之用。

取一月合用之數。約爲三十分。日用其一。

茶飯魚肉、賓客酒漿、子孫紙筆、先生束脩、幹事奴僕等、皆取諸其間。

可○餘○而○不○可○盡○用○至○七○分○爲○得○中○不○及○五○分○爲○太○嗇○  
蓋○於○所○餘○太○多○則○家○益○富○不○至○僭○侈○無○度○而○入○於○  
罪○戾○矣○

其○所○餘○者○別○置○簿○收○管○以○爲○伏○臘○裘○葛○脩○葺○牆○屋○醫○  
藥○賓○客○弔○喪○問○疾○時○節○餽○送○又○有○餘○則○以○周○給○鄰○族○  
之○貧○弱○者○賢○士○之○窮○困○者○佃○人○之○饑○寒○者○過○往○之○無○  
聊○者○毋○以○妄○施○僧○道○蓋○僧○道○本○是○蠹○民○况○今○之○僧○道○  
無○不○豐○足○施○之○適○足○以○濟○其○嗜○欲○長○其○過○惡○而○費○農○  
夫○血○汗○勤○勞○所○得○之○物○未○必○不○增○吾○冥○罪○果○何○福○之○

有哉。其田疇不多。日用不能有餘。則一味節。嗇。裘。葛。取諸蠶績。牆屋取諸畜養。雜種蔬果。皆以助用。不可侵過。次日之物。一日侵過。無時可補。則便有破家之漸。當謹戒之。其有田少而用廣者。但當清心儉素。經營足食之路。於接待賓客。弔喪問疾。時節饋送。聚會飲食之事。一切不講。免致干求親舊。以滋過失。責望故素。以生怨尤。負諱通借。以招恥辱。家居如此。方爲稱宜。而遠吝侈之咎。積是成俗。豈惟一家不憂水旱天災。雖一縣一郡。通天下。皆無憂矣。其利豈不博哉。



居家制用下

居家之病有七。曰呼。曰遊。曰飲食。曰土木。曰爭訟。曰玩好。曰惰慢。有一於此。皆能破家。其次貧薄而務周旋。豐餘而尚鄙嗇。事雖不同。其終之害。或無以異。但在遲速之間耳。夫豐餘而不用者。宜若無害也。然已既豐餘。則人望以周濟。今乃憖然。必失人之情。既失人之情。則人不祐之。惟恐其無隙。苟有隙可乘。則爭媒孽之。雖其子孫亦懷不滿之意。一旦入手。若決堤破防矣。前所言存留十之三者。爲豐餘之多者制也。

苟所餘不能三分則存二分。亦可。又不能二分則存一分。亦可。又不能一分則宜樽節用度以存贏餘。然後家可長久。不然一旦有意外之事必遂破家矣。記曰喪用三年之仂。註謂仂什一也。計今所存留三分之數。喪葬所費其豐約之節當以此爲準。余謂人家婚禮當視喪禮所費則豐約亦似得中。其有貧者豈復可立準則。所謂斂手足形還葬而無槨人豈有非之者。則婚禮亦宜俱無所費。所謂迨其謂之是矣。

前所謂一切不講者。非絕其事也。謂不能以貨財爲禮耳。如弔喪。則以先往後罷爲助。賓客則樵蘇供爨。清談而已。至如奉親最急也。啜菽飲水盡其歡。斯謂之孝。祭祀最嚴也。蔬食菜羹足以致其敬。凡事皆然。則人固不我責。而我亦何歉哉。如此則禮不廢而財不匱矣。前所言以其六分爲十二月之用。以一月合用之數。約爲三十分者。非謂必於其日用盡。但約見每月每日之大槩。其間用度自爲贏縮。惟是不可先次侵過。恐難追補。宜先餘而後用。以無貽鄙吝之譏。

世皆謂用度有何窮盡。蓋是未嘗立法。所以豐儉皆無準。則好豐者妄用以破家。好儉者多藏以斂怨。無法可依。必至於此。愚今考古經國之制。爲居家之法。隨貲產之多寡。制用度之豐儉。合用萬錢者。用萬錢。不謂之侈。合用百錢者。用百錢。不謂之吝。是取中可久之制也。

陸氏家制終

呂新吾先生家訓

傳家兩字曰讀與耕。興家兩字曰讓與忍。防家兩字曰盜與姦。亡家兩字曰淫與賭。休存猜忌之心。休聽離間之語。休作生憤之事。休專公共之利。喫緊在各求盡分。切要在潛消未形。子孫不患少。而患不才。產業不患貧。而患喜。張門戶。不患衰。而患無志。交遊不患寡。而患從邪。不肖子孫。眼底無幾句詩書。胸中無一段道理。神昏如醉。體解如癱。意縱如狂。行卑如丐。敗祖宗成業。辱父母家聲。是人也。鄉黨爲之羞。妻子

爲之泣。豈可入吾祠。葬吾塋乎。戒石俱在。朝夕誦思。

御製資世通訓序

朕於幼時家貧親老無資求師以學業故兄弟不  
於畎畝之間更入縉流遂致聖人賢人之道一槩  
無知幾喪其身焉然雖不知聖人之道何如其當  
時善人之言彼雖不教我我安得不聽信之忽遇  
群雄並起於吾之命如履薄冰不數年間獲衆保  
身又數年衆廣而大興以統天下時乃尋儒問道  
徵知其理故日攻詢訪博采志人中積群言加以  
比較是非其中所言當者非斯人之自能乃上古  
哲人之善行因斯人有志聽懷今為我學而為我  
用於斯人豈徒然哉其有所不當者皆斯人情其

學况平日解悟差矣是致作事倒爲或又爲非以覆身滅姓者有之吾嘗靜以思之凡君天下者代天理物統寰宇之大負教臣民之重上古哲王道與天同今朕匪才薄德却乃握乾符而統寰宇德將安在於是宵晝弗敢自寧但見世人性愚而見淺古有聖經賢傳立意深長爲先儒註以繁辭評論不一愈愚後學者朕特以一己之見總先賢之確論託謁者評之直述其意以引今後人故爲之序云

洪武八年正月

日



資世通訓

君道章

朕於洪武初有謂者來見謂朕曰元君否政豪傑競生民  
不保命已十有六年矣今群雄盡糜君為億兆主政令可  
得而聞乎朕謂謂者曰罔知謂者曰堯舜之道載之於冊  
觀乎曰覽之曰其理何如曰儉曰素曰勤曰敬曰祀曰戎  
曰親曰內曰外曰孝曰慈曰信曰仁曰智曰勇曰嚴曰愛  
曰以時以朕所識者不過於斯十八事爾謂者曰敢請細  
以名之乎曰可夫儉勿過用物素不華其所居勤所以晝  
夜不忘於事不息於當為也敬不遑暇食以措安祀謹百  
神之祭不敢怠戎乃張皇六師以禦侮親親九族以化民  
內曰內宮分定而不紊外外之政內不下孝孝於父母以  
格天慈慈於為父以生孝子信信於始終不變使人從仁  
仁於良善不罪智智於無道可誅勇勇於當為者為嚴嚴

於威儀以正百官愛愛民如赤子以時者使民不奪其時  
謂者曰君備知十八事而億兆安何謂罔知曰此十八事  
聖人之道朕雖欲做之却被妄想私欲以相搏苦其志以  
戰之猶未得退奈何謂者曰若此者退矣何患乎不君朕  
謂謂者曰爾為儒士耳士有士學農有農學工有工學商  
有商學其帝王之政務爾能知之亦曾學乎曰習矣曰士  
夫習王者之政豈不僭分者歟曰古今士習王政必欲為  
帝王師自古弗禁是得學也臣年七十有五時已過矣  
恨壯不逢英明之君老矣乎空懷王者之政惜無可教自  
以為終世而無可陳忽上帝垂民福陛下值元更得君天  
下為生民主臣雖衰朽敢不俯伏天關對越陛下以陳平  
生之所學為陛下思之噫臣更為陛下深思之五荒不可  
作微行可絕遊誠能備行臣之所陳則生民多福被蒼生  
之

臣用章

朕謂謂者曰嘗聞歷代之臣多始而無終者何曰非仁人者不終非忠者不終非知三報一祀者不終假公營私者不終代報者不終非孝者不終非親親者不終又侮瞞欺誑者不終虛詐而自高者不終於斯十七事有一者不得其死而況於備之者乎以爾所言請試名其的非仁者何曰仁者仁愛於善人及萬物者忠為人臣當竭己以奉君勿欺勿瞞勿侮三報一曰爲蒙君恩而當思補報格君之非美君之政助君以仁此一報也二曰奉父母篤以溫清甘旨勤敬而不怠諫父母之非懇切至於沒身不陷父母者此二報也三曰報報民且天地生民極衆無主者必亂故天生君以主之君設百官以助理之民恐有衆暴寡強凌弱所以樂供稅於朝欲父母妻子無憂君得稅而分給百官使不耕而食不蠶而衣特高其位而祿其家使公正

於朝堂使民樂其樂若累受斯職行斯道證民以是非問  
民以疾苦則福壽無窮矣此三報也否此道而公挾私歸  
因公為己代人報怨不孝於祖不睦於親欺誑侮瞞於君  
上者虐民而詐取其所有者自以為尊能而眇視群友者  
此數事有一為者必不得其死一曰祀謂祀神鬼也臣受  
職於外所在或方或隅君託以一方其方隅之事凡當為  
之事無有不可不舉者歷代之臣所以受天災人禍者急  
於教民祀神也蓋君託於彼務欲政令興鬼神祀祀鬼神  
賴於此必待祀事備何其止知樂其身而充其腹忘其所  
祀民苦無憂是致人神共怒因有不得其死

民用前章

朕謂謁者曰世之有烝民多貧而不富多罪而不寧累化  
而不從教奈何謁者曰其多貧而不富多罪而不寧者有  
自來矣云何曰民人父母生其身國王育其命民愚終世

不求達者以問其故失其所報鬼神折磨之是有貧罪不寧之患終世而不免朕謂謁者曰人之身命本為父母保護養者於君何有之哉曰父母所養者身君所養者命曰何謂君所養曰王綱振而強暴息使父母妻子各得性命所有家資皆能保守雖有強梁者不敢擅取此畏王法也豈不見強盜欲人之財異其面別其聲持火夜入人家被劫者家財一空不能抵敵為強所取者何力不及也為此方知有君明日赴官訴其情官乃捕其盜誅其人追贖以給其主以此觀之君豈不為生民之性命者歟保民之家資者歟曰如此者然哉謁者曰此民被盜民之小禍耳又有甚焉若無君以主之則一家皆被盡殺之者有之是謂非君民不可得而活卒之愚民徃徃不知所以甚有誹謗者官有所差亦不親赴者因此獲多貧而不富多罪而不寧是也朕謂謁者曰方今亦有富而頑貧而良者鬼神何不

以富窮報之曰陰法遲而不漏陽憲速而有逃此等之徒  
非身即子有不可免者

民用後章

朕謂謂者曰且如為孝於父母者朝出必告父母知言今  
日往東若要歸來抵日暮方還所告者為何恐至晚不歸  
使父母無方可望其憂甚也故遊必有方孝之至也歸必  
告吉凶使父母樂而無疑其能親親隣隣者人若堅守親  
親隣隣之義則終世而不貧何也六親九族隣里之中必  
有富者人能富不嫌窮親隣則他日子孫或窮諸親隣則  
必養之者是為不貧若見隣人有飢寒下賤者能不憐恤  
又給衣食者其將必大昌見隣人有財其人頗愚若詐而  
取若瞞而盜竊者鬼神鑒見禍焉其必不昌若生子而教  
不為非有文則訓以善事夫諫夫為善不助夫之為惡良  
哉豈獨良而已不使人辱毀之若為人子見父不道諫之

以正為人夫諫妻以柔為人妻諫夫以良遂得白髮相安  
為人弟兄所言者是從之所言不是則諫之善終而無禍  
矣處朋友見善者習之見惡者去之此豈不志人者歟

### 士用章

朕謂謁者曰古今稱能士不得其位何如謁者對曰古今  
稱能士者名而已非識時務者人神安與位焉且名士者  
坐視市村自矜其能聽世俗之諛譽徒知紙上之文諸事  
何曾親歷而自覩者書立言徒咬文嚼字以妨後學者詢  
及行事茫然哉高談闊論以為能於事無益朕曰以爾所  
言士無用矣曰豈盡之矣如伊尹出於莘傳說起版築望  
來磻溪竊戚扣角百里奚牧牛諸葛亮耕南陽此皆善士  
而善賢也曰此數賢未得其位所歷者何事所覩者何為  
曰此數賢者當未遇君之時有志於為造故趨艱難而求  
日用別是非以蓄其衷未嘗區區以訓蒙高枕日紅蓬頭

垢面酣醉晝昏以愚從愚忘其所操棄其所慮是古非今  
迂遇終日安得擅食民膏焉曰若欲成有用之士將何所  
施曰在格物之至精慮人事之過熟講書以人事而言隨  
時而致宜久之志將大矣哉安得不為君用除此之外口  
體腥穢面色痿黃袖手終朝氣不舒而筋不暢不能措諸  
事務况行步趑趄豈異婦人者歟故往往不達者為此也

### 農用章

朕謂謁者曰世之農民皆務本而且勞有不得足食者有  
足食者何謁者曰不足者又足者由勤惰所致耳曰勤惰  
之說有名乎曰可且農之勤者日出而作日入而歸因地  
利而耕以時而種勤除狼莠以時而收儉用不奢酷暑無  
午爇寒不爐忘寒暑以措農工身絕奢侈厚奉父母誠信  
以睦親隣聞王令而不違備此數事天地鑒禾苗茂而歲  
登於斯順昌因勤儉至孝而動鬼神致有如是其情農者



日出而眠日在而歸不察地利而耕失時而種稼考怠除  
時至而無收微得不足身所用者過於父母之奉乃薄失  
誠信於親隣聞王令不畏而違備此數事天地鑒禾苗不  
成雖通天下之豐年惰農之業乃不登於斯否昌因怠惰  
奢侈不孝而怒鬼神致有如是

工用章

朕謂謁者曰民人多巧物物皆可成形華飾威儀壯觀其  
事於斯觀之能哉所得傭工之資其不少何終世而為匠  
未見曰其家謁者曰此雖伎藝之精不過小人而已又非  
高見遠識以正己之伎藝者所以終世不昌為此也曰伎  
藝之人不過如此其高見遠識正己者安用曰所以正己  
之伎藝貴者工其貴賤者工其賤依國今以施巧不使無  
知者記分若乃不昌未之有也今之伎藝者不審國之所  
禁富貴貧賤者合得將圖彩仙靈雕鏤飛走陳用於臣民

凡仙靈飛走乃帝王之所用其非理之民欲之其伎藝者  
從歷代非良民者因有此至與伎藝者兩忘其身家者有  
之何止乎不昌哉

商用章

朕謂謁者曰世之有商賈或貧而或富者終不能久爲何  
謁者曰商賈之心利重貪而無厭其中詐取者甚多兩平  
者間有此等行藏鬼神鑒見所以或貧加於許或富加於  
兩平者或又貧者富富者貧蓋彼各更心之不同耳所以  
貧者獲富以其革詐心而用誠實以此而致富或又富者  
貧之因棄兩平之心而尚詐獲不足而貧生焉朕謂謁者  
曰如此則鬼神之報豈不疾如影響乎曰天網恢恢信不訛  
也曰若此者商賈安能獲富曰無他但不盜詐而用兩平  
則利本俱長且無橫禍焉

僧道章

朕謂謁者曰堯舜時民業果幾曰民業有四所謂四者士農工商曰何無僧道焉曰當堯舜時僧道無今之時有如此二流民業以六所以士農工商釋與道曰僧道終身之後果仙佛歟罪愆歟曰皆有之曰何為而達佛與仙何為而受罪與愆曰去貪嗔而不妄想閉真陽而密靈神其為僧也佛道也仙如務貪嗔妄想放真陽張靈神雖為僧道其墮彌深未却未離苦趣有稽不謬曰彼僧道縱不入佛仙之境但能窮居獨處豈有罪深者耶曰知本性之不悟久處其中甚有汚於俗者不成其家罪之一也家貧親老終無人養而不歸養罪之二也道不成而絕後嗣者罪之三也身為僧道酒色是從有傷二教罪之四也曰如此者縱使達斯道僧道之學不過獨善其身游食於民使無之可乎曰不可曰何故曰天道使然耳曰其理果何曰益王綱而利良善凶頑是化世所不知其功以其理道之幽微

王臣無憎愛其教或憎或愛皆非王臣之所為若烝民樂從者世道昌王仁矣

### 愚癡章

朕謂謁者曰世人愚多而賢少為何曰父母蠢而愚其子夫何故曰子幼而不師人以教之此其所以愚謁者曰願對陛下細陳愚人之狀曰愚人狀有幾曰愚之狀有七一曰不知理二曰因不知理則生不孝三曰不知耻四曰非理傷人五曰為賊六曰為妖七曰為癡曰愚癡異乎曰人之愚者不過初不知聖人古人之理故諸事妄為耳未必生成之癡因愚之久癡自此而生曰癡何故曰當為而不為是為癡不可為而為之是為癡此是因愚而生之者非寒暑所侵病由五臟而患也

### 教子章

朕謂謁者曰有父母不賢而不愚子無師而乃仁於六親

和父母孝弟於兄朋友信睦四鄰農者勤於農士者勤於士博精於人事其源何如曰父母雖不賢不愚淳心之人也雖不外張內必有理其子不見師家必父母為之以自訓所以博精於人事以其家訓少通其子能詢於衆雖無一定之師聽衆人所長積之於心甚於一師之學又過常人者也且一師之學一人之見而已其衆人之所知聽之於心豈不博精於人事者歟

### 造言章

朕謂謂者曰昔者天下安和人民樂業且是太平何故小民掘家棄業擅執兵器奮然而起於鄉里不相容甚至六親亦被殺害被威逼者挈家從之其為首者擅稱皇帝名號以拒天朝初雄猛不可當有不數月數年或旬日其勢如水之見日雪之迎湯其身家父母妻子一槩化為泥土初則未必不雄終不能成於事者何謂者曰此等愚昧之

徒自上古有之。往往被殺。久之又生。為何。蓋生不學道理。日與無狀小人相處。積姦頑於心。不能變也。直至殺身。是了。况此等之人。為無道之君禍。為新興之君福。曰。何以見之。曰。天下未亂。之先。陛下身居草野。侶影朝暮。當時聽陛下所驅者。誰曰無。曰。今日所馭者。兵非百萬。而止億兆。仰瞻人各立命。此皆親親為之乎。人皆以鄉里從之乎。曰。非也。親不過百家鄉里。不過萬數餘。皆非識者。曰。此天與之乎。曰。然。曰。前首亂者。不能為。而敗陛下。晚舉而統寰宇。此天與之人。歸之首亂者。不得而。又代陛下為驅除大勢耳。及陛下出彼先亡天也。夫不與先亂者。以其先亂者。不分親親鄉里。及無罪良人。一樂殺之上。帝厭其惡禍。及其身從古及今之賢者。皆稱國王。王子及天下世界。稱為神。故也。蓋謂國家大事。皆神天管着。故天不與不敢取。取則必敗為此也。朕謂謂者。曰。爾言胡殺無罪之人。有罪他初。

起之時若不如此人何有怕曰然初起但不殺人人不怕  
又恐隣里親戚拿了不得不殺纔殺人上天又怒了事將  
成而首亂者死天命真人故所謂神器也昔秦末陳勝吳  
廣以妖術惑衆各稱王號後皆為人所殺而成大業者乃  
漢高祖得之後漢時黃巾張角亦以妖術自稱天公將軍  
後為皇甫嵩所滅隋時宋子賢詐稱彌勒佛出世聚香親  
後亦為人戮死而唐太宗成其大事唐玄宗時王懷古捏  
造妖言誑惑百姓後乃為唐所殺宋時王則以妖術僭號  
東平王言彌勒佛治世後為文彥博所擒古今明驗可不  
戒歟

### 民禍章

朕謂謁者曰世有民禍者曰何謂民禍曰且如一村有百  
家一城有萬家或千家其間若有一箇或男子或婦人或  
造妖言或作潑皮或為強盜或為小賊此為民禍也朕謂

謁者曰彼一男子一婦人或妖或頑或為盜賊或為潑皮  
身做身當於隣里何禍之有曰古至如今法干四隣雖不  
坐罪亦問惡人之所以或為惡人誣指或被貪官汚吏挾  
詐輕則糜費資財甚則喪及身家焉曰如此等之人可得  
而昌乎曰罪之又罪禍之又禍安得命耶何至昌哉曰斯  
人之禍自何而至曰天殃人禍也不可免嗚呼上天之鑒  
人可不畏耶曰願陛下脩明政刑則上帝福之

### 民福章

謁者謂朕曰世之有民福者曰何謂民福曰且如一村一  
城或千萬家為隣中有一男子一婦人彼父母有教本身  
有德家道又昌百事順鄰里若有愚頑幾壞事及將欲作  
惡者彼先知之隨教而改往往如是其一村一城之人皆  
被其教其市村終無橫禍互相連及得享太平之世此民  
之福也曰可終世及子孫者巨富乎曰上天之鑒福之又



福將必大昌豈止富而已乎

御製資世通訓

臣聞古先哲王之治天下也克盡君師之道政教兼備所以風俗厚而治化隆後之為君能善其政者固有之矣其兼師道而善政者猶或闕焉欽惟

皇上以生知之聖聰明神武撥亂世而歸之正創業垂統紀綱粲然法度昭著其於君道備矣善政得矣尚慮夫百官庶民未能盡其職分之所當為乃著書十有四篇以示訓戒首以人君所當為者十有八事為言則皆

皇上平日躬行心得之效矣然猶不自滿足有謙虛敬慎之意焉次言人臣所不當為者十有七事其三其四則為民用章又以士農工商各為一

篇合僧道為一篇念民之愚癡欲民之教子戒其造言示以禍福又各為一篇以勸懲之辭意明切誨諭諄至無非欲其改過遷善同享太平之樂故名曰資世通訓大哉言乎斯言也信乎克盡君師之道而善教備矣嗟乎為人臣而能遵此訓則為賢臣非徒有以垂功名於竹帛又可以保富貴於子孫矣為民而能遵此訓則可以保身全家為良民矣為士而能遵此訓則知浮藻空言之無益當思措諸事業以自効矣為農而能遵此訓則不為惰農服田力穡而有秋成之望矣為工而能遵此訓則不為巧僭無益之技而有以利天下之用矣為商而能遵此訓

則不貪冒犯險而有以通天下之貨矣為僧道  
而能遵此訓則有以成仙佛之行非徒能獨善  
其身又可以化民為善矣斯言行於天下非徒  
足以為訓於當時實足以垂訓於萬世矣臣堯  
以草茅愚質備員翰林伏讀再三不勝感激謹  
拜手稽首而書于簡末云

洪武八年歲在乙卯二月丙午翰林 國史院

編脩官臣趙堯謹序

鄭氏家範序

惟浦江義門鄭氏治家作規貽示孫子家長教  
立宗子一人以奉祖考以一宗族勛帥其屬而  
勤家政佐佑典事二人糾正善不善監視一人  
會布泉穀粟出內主記一人掌計運新管二人  
掌冠婚喪祭饌舊管一人歲掌男女衣資羞服  
長一人日掌家衆膳食掌膳一人啓肆委人畜  
牧樹藝各掌之知賓二人掌門戶一人虞燭一

人嘉禮莊一義塾一藥區一義塋一義祠一功  
過月錄勸懲一書續寘業受產一書穀內歲計  
總租一書畸零一書蠶棉督織一書宗族黨里  
援拯推仁一書鍾聞起風興一書宣規聲鍾罰  
逆鼓鼓規共百又六十八條爨合十有餘世曆  
二百六十餘年 明太祖高皇帝問其後胤濂  
治家所以長久之道濂對曰守家規不聽婦人  
言 帝詔大褒異之吾歛師山鄭公致命時遺

札子姪曰孝友必如浦江義門祖宗之榮也迄  
萬曆乾菴江先生佐守金華詢義門獲其規效  
於家五十餘年厥嗣于常授施生璜璜授鄭生  
永立永立手家規痛念其師山公札喟然曰予  
先人之志也夫予先人之志也夫志廼志事廼  
事爰榜師山書院敦請諸老講明之且梓之廣  
勵族人請予序牘曰於戲事廼事志廼志哉懋  
哉懋哉此推行朱子之家禮也巨冠婚喪祭細

竹樹陂池針澤履材衾絮湯茗藥檣積蟲鳥獵  
謳巫鑷教惟孝惟友惟禮惟讓惟仁惟恕惟公  
要惟誠行十有餘世年歷二百六十此推行家  
禮之效也作規厥祖布衣者行篤爲義門鄭於  
戲戶行戶鄭矣鄭云乎哉於戲居可爲之位乘  
可爲之勢如是行周禮卜年卜世夫焉有不成  
周者哉昔康熙戊申七月朔旦新安友人胡朋  
題





浦江鄭氏家範引

浦江鄭氏世居縣東二十五里鄉名感德里曰  
仁義其遠祖冲素處士綺自宋建炎初至今同  
居已十有餘世歷二百六十餘年守詩書禮樂  
之教弗墜宋元二史具載孝義傳中然其持守  
之規前錄五十八則六世孫龍灣稅課提領太  
和所建後錄七十則續錄九十二則七世孫青  
槐府君欽江浙都事鉉所補皆已勒石鐫梓時

公卿大夫士所遺詩文亦類爲麟溪集二十二卷刊示後昆今八世孫太常博士濤復爲三規閱世頗久其中當有隨時變通者乃率諸弟泳渙湜等白於二兄濂源同加損益而合於一其聞諸父之訓曾行而登未載者因增入之總爲一百六十八則名曰鄭氏家範旣刊板可模印請言其故於篇端余與源爲姻家濤爲同門友而泳等又皆執經從余學義不容辭嗚呼是編

之行其於厚人倫美教化之道誠有益哉

洪武十一年冬十月庚子朔翰林院學士金華

宋濂引

浦江鄭氏家範

一立祠堂一所以奉先世神主出入必告正至朔望必叅俗節必薦時物四時祭祀其儀式並遵文公家禮然各用仲月望日行事事畢更行會拜之禮

一時祭之外不得妄祀徼福凡遇忌辰孝子當用素衣致祭不作佛事象錢寓馬亦併絕之是日不得飲酒食肉聽樂夜則出宿於外

一祠堂所以報本宗子當嚴灑掃局鑰之事所

有祭器服不許他用

祭器服如深衣席褥盤盞椀楪椅桌盥盤之類

一祭祀務在孝敬以盡報本之誠其或行禮不

恭離席自便與夫跛倚欠伸噦噫嚏咳一切

失容之事督過議罰督過不言衆則罰之

一撥常稔之田一百五十畝

世遠  
遂增

別畜其租專

充祭祀之費其田恭印義門鄭氏祭田六字

字號步畝亦當勒石祠堂之左俾子孫永遠

保守有言質鬻者以不孝論

一子孫入祠堂者當正衣冠即如祖考在上不得嬉笑對語疾步晨昏皆當致恭而退

一宗子上奉祖考下壹宗族家長當竭力教養若其不肖當遵橫渠張子之說擇次賢者易之

一諸處塋塚歲節及寒食十月朔子孫須親展省

婦人不與

近塋竹樹不許剪拜各處庵宇更當

昔治至於作塚制度已有家禮可法不必過奢

一墳塋年遠其有平塌淺露者宗子當擇潔土益之更立石深刻名氏勿致湮滅難考

一四月一日係初遷之祖遂陽府君降生之朝宗子當奉神主於有序堂集家衆行一獻禮復擊鼓一十五聲令子弟一人朗誦譜圖一過曰明譜會圓揖而退

一朔望家長率衆叅謁祠堂畢出生堂上男女  
分立堂下擊鼓二十四聲令子弟一人唱云  
聽聽聽凡爲子者必孝其親爲妻者必敬其  
夫爲兄者必愛其弟爲弟者必恭其兄聽聽  
聽毋徇私以妨大義毋怠惰以荒厥事毋縱  
奢侈以干天刑毋用婦言以間和氣毋爲橫  
非以擾門庭毋耽麴蘖以亂厥性有一於此  
旣殞爾德復隳爾胤睦茲祖訓實係廢興言



之再三爾宜深戒聽聽衆皆一揖分東西  
行而坐復令子弟敬誦孝弟故實一過會揖  
而退

一每旦擊鐘二十四聲家衆俱興四聲咸盥漱  
八聲入有序堂家長中坐男女分坐左右令  
未冠子弟朗誦男女訓戒之辭男訓云人家  
盛衰皆係乎積善與積惡而已何謂積善居  
家則孝弟處事則仁恕凡所以濟人者皆是

也何謂積惡恃己之勢以自強尅人之財以自富凡所以欺心者皆是也是故能愛子孫者遺之以善不愛子孫者遺之以惡傳曰積善之家必有余慶積不善之家必有余殃天理昭然各宜深省女訓云家之和與不和皆係婦人之賢否何謂賢事舅姑以孝順奉丈夫以恭敬待娣姒以溫和接子孫以慈愛如此之類是已何謂不賢淫狎妬忌恃強凌弱

真武廟志  
四  
搖鼓是非縱意徇私如此之類是已天道甚  
近福善禍淫爲婦人者不可不畏誦畢男女  
起向家長一揖復分左右行會揖而退九聲  
男會膳於同心堂女會膳於安貞堂三時並  
同其不至者家長規之

一家長總治一家大小之務凡事令子弟分掌  
然須謹守禮法以制其下其下有事亦須咨  
稟而後行不得私假不得私與

一家長專以至公無私爲本不得徇偏如其有失舉家隨而諫之然必起敬起孝毋妨和氣若其不能任事次者佐之

一爲家長者當以至誠待下一言不可妄發一行不可妄爲庶合古人以身教之之意臨事之際毋察察而明毋昧昧而昏更須以量容人常視一家如一身可也

一家中產業文券旣印義門公堂產業子孫永

守等字仍書字號寘立砧基簿書告官印押  
續寘當如此法家長會衆封藏不可擅開不論長幼  
有敢言質鬻者以不孝論

一子孫儻有私寘田業私積貨泉事迹顯然彰  
著衆得言之家長家長率衆告於祠堂擊鼓  
聲罪而榜於壁更邀其所與親朋告語之所  
私即便拘納公堂有不服者告官以不孝論  
其有立心無私積勞於家者優禮遇之更於

勸懲簿上明記其績以示於後

一子孫賭博無賴及一應違於禮法之事家長  
度其不可容會衆罰拜以愧之但長一年者  
受三十拜又不悛則會衆而痛箠之又不悛  
則陳於官而放絕之仍告於祠堂於宗圖上  
削其名三年能改者復之

一凡遇凶荒事故或有闕支家長預爲區畫不  
使匱乏

真山家範  
一朔望二日家長檢點一應大小之務有不篤行者議罰諸簿籍或過日不算結及失時不具呈者亦量情議罰

一內外屋宇大小修造工役家長常加檢點委人用工毋致損壞

一每歲掌事子弟交代先須謁祠堂書祝致告次拜家長然後領事

一設典事二人以助家長行事必選剛正公明

才堪治家爲衆人之表率者爲之並不論長幼不限年月凡一家大小之務無不預焉每夜須了諸事方許就寢違者家長議罰

一每夜會聚之際典事對衆商確何日可行某事書之於籍上半月所書下半月行之下半月所書次上半月行之庶無迂滯之患

事當即行

者弗拘

一擇端嚴公明可以服衆者一人監視諸事

十四



以上方可然有善公言之有不善亦公言之  
必二年一輪如或知而不言與言而非實衆告祠堂鳴鼓  
聲罪而易寘之

一監視泣事告祠堂畢集家衆於有序堂先拜  
尊長四拜次受卑幼四拜然後鳴鼓細說家  
規使肅聽之

一監視糾正一家之是非所以爲齊家之則而  
家之盛衰係焉不可顧忌不言在上者必當

犯顏直諫諫若不從悅則復諫在下者則教  
以人倫大義不從則責又不從則撻

一立勸懲簿令監視掌之月書功過以爲善善  
惡惡之戒有沮之者以不孝論

一造二牌一刻勸字一刻懲字下空一截用紙  
寫帖何人有何功何人有何過旣上勸懲簿  
更上牌中挂會揖處三日方收以示賞罰  
一設主記一人以會貨泉穀粟出納之數凡穀

匣收滿主記封記不許擅開違者量輕重議  
罰如遇開支主記不親視罰亦如之鑰匙皆  
主記收遇開則漸次付之支訖復還主記  
一選老成有知慮者通掌門戶之事輪納賦租  
皆稟家長而行至於山林陂池防範之務與  
夫增拓田業之勤計會財息之任亦併屬之  
一立家之道不可過剛不可過柔須適厥中凡  
子弟當隨掌門戶者輪去州邑練達世故庶

無瞢暗不諳事機之患若年過七十者當自  
葆綏不宜輕出

一增拓產業長上必須與掌門戶者詳其物與  
價等然後行之或掌門戶者他出必俟其歸  
方可交易然又預使子弟親去看視肥瘠及  
見在文憑無差切不可鹵莽以爲子孫之害

一凡寘產業即時書於受產簿中不許過於次  
日仍用招人佃種其或失時不行家長朔望

點檢議罰

一增拓產業彼則出於不得已吾則欲爲子孫  
悠久之計當體究果值幾緡盡數還足不可  
與駟僧交謀潛萌侵人利己之心否則天道  
好還縱得之必失之矣交券務極分明不可  
以物化貨逋負相準或有欠者後當索償又不  
可以秋稅暗附他人之籍使人倍輸官府積  
禍匪輕

一每年之中命二人掌管新事所掌收放錢粟  
之類又命二人掌管舊事所掌冠婚喪祭及  
飲食之類然皆以六月而代務使勞逸適均  
一新舊管輪當須視爲切己之事計會經理自  
二十五歲至六十歲止過此血氣旣衰當優  
遇之母任以事

一新舊管皆實日簿每日計其所入幾何所出  
幾何總結於後十日一呈監視果無私濫則

監視書其下曰體驗無私後若顯露先責監視次及新舊管

一新管實一總租簿明寫一年逐色穀若干石總計若干石又新實田若干石此是一定之額却於當年十二月望日以所收者與前數總較之便知實欠多少以憑催索後索到者別書於畸零簿至交代時却入總租簿內通算

一新管所收穀麥每匣收訖即結總數報於主  
記寘租賦簿令其親書某號匣係某人於某  
年月日收何等穀麥若干石量出之時亦須  
寘簿書寫某匣椿磨自某日支起至某日用  
畢以憑稽考

一新管所管穀麥必當十分用心及時收曬免  
致黷爛收支明白不至虧折關防勤謹不至  
遺失賞則及之若有前弊罰本年末資綿線



不給如遇稱收繁冗則撥子弟分收之

一佃人用錢貨折租者新管當逐項收貯別附於簿每日納諸家長至交代時通結大數書於總租簿云收到佃家錢貨若干總計租穀若干如以禽畜之類準折者則付與舊管支錢入帳不可與雜色錢同收

一田地有荒蕪者新管逐年招佃或遇墾江亦即書簿以俟開墾開墾既畢復入原簿免致

失於照管

一田租既有定額子孫不得別增數目所有逋租亦不可起息以重困里黨之人但務及時勤索以免虧折

一佃家勞苦不可備陳試與會計之所獲何嘗補其所費新管當矜憐痛憫不可縱意過求設使爾欲既遂他人謂何否則貽怒造物家道弗延除正租外所有佃麥佃雞之類斷不

可取

一鄰族分歲之飲舊管於冬至後排日爲之  
一男女六十者禮宜異膳舊管盡心奉養務在  
合宜違者罰之

一新管簿書不分明者不許交代一應催督錢  
穀須是先期逐項詳註已未收索之數於交  
代日分明條說併承帳人交付雖累更新管  
要如出於一手庶不使人欺隱舊管簿書不

分明者亦不許交代

一所用監視及新舊管其有才幹優長不可遽代者聽衆人舉留

一設羞服長一人專掌男女衣資之事宜先措置夏衣之給須在四月冬衣之給須在九月不得臨時猝辦如或過時不給家長罰之

男女週歲則給

一男子衣資一年一給十歲已上者半其給

以布十六歲以上者全其給兼以帛四十歲  
已上者優其給、以帛仍皆給裁製之費若  
年至二十者當給禮衣一襲

中履則一  
年一更

一婦人衣資照依前數兩年一給之女子及笄  
者給銀首飾一副

一每歲羞服長除給男女衣資外更於四時祭  
後一日俵散諸婦履材及油澤脂粉針花之  
屬

一各房染段羞服長斟酌爲之仍實簿書之母使多寡不均

一子孫須令飽煖方能保全義氣當今廉謹有爲者以掌羞服之事務要合宜而無不足之歎

一設掌膳二人以供家衆膳食之事務要及時烹爨不許干預舊管雜役亦須一年一輪一擇廉謹子弟二人收掌錢貨所出所入皆明

白附簿或有折陷者勒其本房衣資首飾補還公堂

一擇廉幹子弟二人以掌營運之事歲終會筭通計其數呈於家長監視嚴加關防察其私濫

一子孫以理財爲務者若沉迷酒色妄肆費用以致虧陷家長覈實罪之與私寘私積者同

一委人啟肆皆公堂給本與之一年一度新管

爲之結算其子錢納諸公堂

一畜牧樹蔬當令一人專掌之須實簿書寫數目以憑稽考然須常加點檢務要增益如或失時不辦住本人本年衣資不給

一設知賓二人接奉談論提督茶湯點視牀帳被褥務要合宜

一親賓往來掌賓客者稟於家長當以誠意延款務合其宜雖至親亦宜宿於外館



一親朋會聚若至十人舊嘗不許於夜中設宴  
時有小酌亦不許至一更晝則不拘

一親姻饋送一年一度非常弔慶則不拘此切不  
可過奢又不可視貧而加薄視富而加厚

一子弟未冠者學業未成不聽食肉古有是法  
非惟有資於勤苦抑欲其識齏鹽之味

一子弟未冠者不許以字行不許以第稱庶幾  
合於古人責成之意

一子弟年十六以上許行冠禮須能暗記四書  
一經正文講說大義方可行之否則直至二  
十一歲弟若先能則先冠以媿之

一子弟當冠須延有德之賓庶可責以成人之  
道其儀式盡遵文公家禮

一子弟已冠而習學者每月十日一輪挑背已  
記之書及譜圖家範之類初次不通去巾一  
日再次不通則倍之三次不通則分紒如未

冠時通則復之

一女子年一及笄者母爲選賓行禮製辭字之  
一婚姻乃人道之本親迎醮啐奠鴈授綏之禮  
人多違之今一祛時俗之習其儀式並遵文  
公家禮

一婚姻必須擇溫良有家法者不可慕富貴以  
虧擇配之義其豪強逆亂世有惡疾者母得  
與議

一立嘉禮莊一所撥田一千五百畝世遠逐增別儲其租令廉幹子弟掌之專充婚嫁諸費男女各以穀一百五十石爲則

一娶婦須以嗣親爲重不得享賓不得用樂違者罰之入門四日壻婦同往婦家行謁見之禮

一娶婦三日婦則見於祠堂男則拜於中堂行受家規之禮先拜四拜家長以家規授之祝

其謹守弗失復拜四拜而去又以房扁授之  
使其揭於房闥之外以爲出入觀省會茶而  
退

一子孫當娶時須用同身寸製深衣一襲巾履  
各一事仍令自藏以備行禮之用

一子孫有妻子者不得更寘側室以亂上下之  
分違者責之若年四十無子者許置一人不  
得與公堂坐

一女子議親須謀於衆其或父母於幼年妄自  
許人者公堂不與粧奩

一女適人者若有外孫彌月之禮惟首生者與  
之餘並不許但令人以食味慰問之

一甥壻初歸除公堂以禮與之不得別有私與  
諸親並同

一姻家初見當以幣帛為贄不用銀簪他有饋  
者此亦不受

一喪禮久廢多惑於釋老之說今皆絕之其儀式並遵文公家禮

一子孫臨喪當務盡禮不得惑於陰陽非禮拘忌以乖大義

一喪事不得用樂服未闋者不得飲酒食肉違者以不孝論

一子孫器識可以出仕者頗資勉之既仕須奉公勤政毋蹈貪黷以忝家法任滿交代不可

過於留戀亦不宜恃貴自尊以驕宗族仍用  
一遵家範違者以不孝論

一子孫儻有出仕者當蚤夜切々以報國爲務  
撫恤下民實如慈母之保赤子有申理者哀  
矜懇惻務得其情毋得苛虐又不可一毫妄  
取於民若在任衣食不能給者公堂資而勉  
之其或廩祿有餘亦當納之公堂不可私於  
妻孥競爲華麗之飾以起不平之心違者天



實臨之

一子孫出仕有以職墨聞者生則於譜圖上削

去其名死則不許入祠堂

如果被誣指者則不拘此

一宗人實共一氣所生彼病則吾病彼辱則吾

辱理勢然也子孫當委曲庇覆勿使失所切

不可恃勢凌轢以忝厥祖更於缺食之際揆

其貧者月給穀六斗直至秋成佳給其不能

婚嫁者助之

一爲人之道舍教其何以先當營義方一區以  
教宗族之子弟免其束脩

一宗族之無所歸者量撥房室以居之更勸勿  
用火葬無地者聽埋義塚之中

一立義塚一所鄉鄰死亡委無子孫者與給槨  
積埋之其鰥寡孤獨果無以自存者時賙給  
之

一宗人無子實墜厥祀當擇親近者爲繼立之

更少資之

一宗人苦寒深當憫惻其果無衾與絮者子孫當量力而資助之

一祖父所建義祠蓋奉宗族之無後者立春祭先祖畢當令子弟設饌祭之更爲修理毋致墮壞

一立春當行會族之禮不問親疎戶延一人食品以三進爲節

一里黨或有缺食裁量出穀借之後催原穀歸還勿收其息其產子之家給助粥穀二斗五升

一展藥市一區收貯藥材鄰族疾病其證章可驗如瘡痢癰癤之類施藥與之更須診察寒熱虛實不可慢易此外不可妄與恐致悞人

一橋圯路淖子孫儻有餘資當助修治以便行

客或遇隆暑又當於通衢設湯茗一二處以濟渴者自六月朔至八月朔止

一里黨之疴癢疾痛吾子孫當深念之彼不自給况望其饋遺我乎但有一毫相贈亦不可受違者必受天殃

一拯救宗族里黨一應等務令監視置推仁簿逐項書之歲終於家長前會筭其或沽名失實及執吝不肯支者天必絕之此吾拳、真

切之言不可不謹不可不慎

一子孫須恂：孝友實有義家氣象見兄長坐  
必起行必以序應對必以名母以爾我諸婦  
並同

一子孫之於尊長咸以正稱不許假名易姓  
一兄弟相呼各以其字冠於兄弟之上伯叔之  
命姪亦然姪之稱伯叔則以行稱繼之以父  
夫妻亦當以字行諸婦娣如相呼並同

一子姪雖年至六十者亦不許與伯叔連坐違者家長罰之會膳不拘

一卑幼不得抵抗尊長一日之長皆是其有出言不遜

制行悖戾者姑誨之誨之不悛者則重笞之一子孫受長上訶責不論是非但當俯首默受毋得分理

一子孫固當竭力以奉尊長為尊長者亦不可挾此自尊攘拳奮袂忿言穢語使人無所容

身甚非教養之道若其有過反覆諭戒之甚不得已會衆箠之以示耻辱

一子孫黎明聞鐘即起監視置夙興簿令各人親書其名然後就所業或有托故不書者議罰

一子孫飲食幼者必後於長者言語亦必有倫應對賓客不得雜以里俗方言

一子孫不得謔浪敗度免巾徒跣凡諸舉動不



宜掉臂跳足以陷輕儇見賓客亦當肅行祇揖不可參差錯亂

一子孫不得觀非禮之書其涉戲謔淫褻之語者即焚毀之妖幻符咒之屬並同

一子孫不得從事交結以保助閭里為名而恣行己意遂致輕冒刑憲墮圯家業故吾再三言之切宜刻骨

一子孫毋習吏胥母為僧道母狎屠豎以壞亂

心術當時以仁義二字銘心鏤骨庶或有成  
一廣儲書籍以惠子孫不許假人以致散逸仍  
識卷首云義門書籍子孫是教鬻及借人茲  
為不孝

一延迎禮法之士庶幾有所觀感有所興起其  
於問學資益非小若詭詞幻學之流當稍欸  
之復遜辭以謝絕之

一小兒五歲者每朔望叅祠講書及忌日奉祭

可令學禮

入小學者當預四時祭祀

每日蚤膳後亦隨衆

到書齋祇揖須值祠堂者及齋長舉明否則罰之其母不容亦罰之

一子孫自八歲入小學十二歲出就外傅十六歲入大學聘致明師訓飭必以孝弟忠信為主期底於有道若年至二十一歲其業無所就者令習治家理財向學有進者弗拘

一子孫年十二於正月朔則出就外傅見燈不

許入中門入者簪之

一子孫為學須以孝義切、為務若一向偏滯  
詞章深所不取此實守家第一事不可不慎  
一子孫年未二十五者除綿衣用絹帛外餘皆  
衣布除寒凍用蠟履外其餘遇雨皆以麻履  
從事三十里內並須徒步初到姻親家者不  
拘

一子孫年未三十者酒不許入唇壯者雖許少

飲亦不宜沉酗杯酌喧呶鼓舞不顧尊長違  
者箠之若奉延賓客唯務誠懇不必強人以  
酒

一子孫當以和待鄉曲寧我容人毋使人容我  
切不可先操忽人之心若累相凌逼進之不  
已者當理直之

一秋成穀價廉平之際糴五百石別爲儲畜遇  
時闕食依原價糶給鄉鄰之困乏者

一子孫不得惑於邪說溺於淫祀以徼福於鬼神

一子孫不得修造異端祠宇粧塑土木形像

一子孫處事接物當務誠朴不可置纖巧之物務以悅人以長華麗之習

一子孫不得與人炫奇鬪勝兩不相下彼以其奢我以吾儉吾何害哉

一旣稱義門進退皆務盡禮不得引進娼優謳

詞獻妓娛賓狎客上累祖宗之嘉訓下教子孫以不善甚非小失違者家長箠之

一家業之成難如升天當以儉素是繩是準唯酒器用銀外子孫不得別造以敗我家風一俗樂之設誨淫長奢切不可令子孫聽復習肆之違者家長箠之

一棋枰雙陸詞曲蟲鳥之類皆足以盡心惑志廢事敗家子孫當一切棄絕之

一子孫不得畜養飛鷹獵犬專事游佚亦不得恣情取饜以敗家事違者以不孝論

一吾家既以孝義表門所習所行無非積善之事子孫皆當體此不得妄肆威福圖脅人財侵凌人產以為祖宗植德之累違者以不孝論

一子孫受人贄帛皆納之公堂後與回禮

一子孫不得無故設席以致濫支唯酒食是議



君子不取

一子孫不得私造飲饌以徇口腹之欲違者姑

誨之誨之不悛則責之

產者病者不拘

一凡遇生朝父母舅姑存者酒果三行亡者則

致恭祠堂終日追慕

一壽辰既不設筵所有襪履亦不可受徒蠹女

工無益於事

一家中燕饗男女不得互相獻酬庶幾有別

若家

長舅姑禮宜  
饋食者不拘

一各房用度雜物公堂總買而均給之不可私  
托鄰族越分競買鮮華之物以起乖爭

一家衆有疾當痛念之延良醫以救療之

一居室既多守夜當輪用已娶子弟終夜鳴磬  
以達於旦仍鳴小磬週行居室者四次所過  
之處隨手啟閉門扃務在謹嚴以防偷竊有  
故不在家者次輪當者續之

一防虞之事除守夜及就外傳者別設一人謹

察風燭掃拂灶塵凡可以救災之具常須增

寘

若油籃繫  
索之屬

更列水缸於房闥之外

冬月用  
草結蓋

以護寒凍復於空地造屋安置薪炭所有辟蚊藁

燼亦棄絕之

一旱暵之時子弟不得吝惜陂塘之水以妨灌  
注

一諸婦必須安詳恭敬奉舅姑以孝事丈夫以

禮待娣姒以和然無故不出中門夜行以燭  
無燭則止如其淫狎即宜屏放若有妬忌長  
舌者姑誨之誨之不悛則責之責之不悛則出  
之

一諸婦媒言無耻及干與閫外事者當罰拜以  
媿之

一諸婦初來何可使責以吾家之禮限半年皆  
要通曉家規大意或有不教者罰其夫

一初來之婦一月之外許用便服

一諸婦服飾毋事華靡但務雅潔違則罰之更  
不許飲酒<sub>其</sub>年過五十者弗拘

一諸婦之家貧富不同所用器物或有或無家  
長量度給之庶使均而無怨

一諸婦主饋十日一輪年至六十者免之新娶  
之婦與假三月三月之外即當主饋主饋之  
時外則告於祠堂內則會茶以聞于衆托故

不至者罰其夫膳堂所有鎖鑰及器皿之類  
主饋<sup>者</sup>次第交之

一諸婦工作當聚一處機杼紡績各盡所長非  
但別其勤惰且革其私心

一主母之尊欲使家衆悅服不可使側室為之  
以亂尊卑

一每歲畜蠶主母分給蠶種與諸婦使之在房  
畜飼待成熟時却就蠶屋上箔須令子弟值

宿以防風燭所得之繭當就一處抽繅更預  
先抄寫各房所畜多寡之數照什一之法賞  
之

一諸婦每歲所治絲綿之類羞服長同主母稱  
量付諸婦共成段疋羞服長復著其銖兩於  
簿主母則催督而成之諸婦能自織造者羞  
服長先用什一之法賞之然後給散於衆  
一諸婦每歲公堂於九月俵散木棉使成布疋

限以次年八月交收通賣錢物以給一歲衣  
資之用公堂不許侵使或有故意製造不佳  
及不登數者則準給本房甚者住其衣資不  
給病者有能依期而登數者照什一之法賞  
之其事並係羞服長主之

一諸婦育子不得接受鄰族雞子彘胃之類舊  
管日週給之

一諸婦育子苟無大故必親乳子不可置乳母



以飢人之子

一諸婦之於母家二親存日禮得歸寧無者不許其有慶弔勢不可已者但令人往

一諸婦姻親頗多除本房至親與相見外餘並不許可相見者亦須子弟引導方入中門見

燈不許違者會衆罰其夫

主母不拘

一婦人親族有為僧道者不許往來

一朔望後一日令諸生聚揖之時直說古列女

傳使諸婦聽之

一世人女往往多致湮沒縱曰女子難嫁荆釵裙布有何不可諸婦違者議罰

一女子年及八歲者不許隨母到外家餘雖至親之家亦不許往違者重罰其母

一少母但可受自己子婦跪拜其餘子弟不過

長揖諸婦並同有違之者監視議罰

死後忌日亦同

一男女不共圍溷不共溜浴以謹其嫌春冬則

十日一浴夏秋不拘

一男女不親授受禮之常也諸婦不得用刀鐮  
工剃面

一莊婦類多無識之人最能翻闔是非若非高  
明鮮有不遭其聾聵切不可縱其來往歲時  
展賀亦不可令入房闥

浦江鄭氏家範

終